

PËR PROCEDURAT E PËRLLOGARITJES SË PËRFITIMEVE NGA LIGJET E MËPARSHME DHE TË PAGESAVE TË DËMSHPËRBLIMIT PËR ISH-TË DËNUARIT POLITIKË TË REGJIMIT KOMUNIST

Në mbështetje të pikës 4, neni 102 të Kushtetutës së Republikës së Shqipërisë; të ligjit nr. 9831, datë 12.11.2007, “Për dëmshpërblimin e ish-të dënuarve politikë të regjimit komunist”, të ndryshuar; si dhe të VKM-së nr. 419, datë 14.4.2011, “Për miratimin e afateve dhe skemës së shpërndarjes së fondeve të dëmshpërblimit për ish-të dënuarit politikë të regjimit komunist”, të ndryshuar; si dhe të VKM-së nr. 1253, datë 2.7.2008, “Për përcaktimin e kriterëve dhe procedurave të vlerësimit për dëmshpërblimin e përfutur nga ish-të dënuarit politikë të regjimit komunist”, të ndryshuar;

UDHËZOJ:

I. Qëllimi i udhëzimit

Ky udhëzim ka për qëllim:

1. Përcaktimin e rregullave dhe të procedurave që duhet të ndiqen në procesin e dëmshpërblimit financiar për ish-të dënuarit politikë të regjimit komunist, të miratuar.

2. Përcaktimin e procedurave standarde për përllogaritjen e përfitimeve financiare të marra nga ligjet e mëparshme nga ish-të dënuarit politikë.

II. Procedurat dhe përgjegjësitë për llogaritjen e përfitimeve të marra nga ligjet e mëparshme në të holla (lek) dhe letra me vlerë

1. Për përllogaritjen e masës së dëmshpërblimit financiar të marrë nga ligjet e mëparshme, në të holla (lek) dhe letra me vlerë, nëpunësi përgjegjës formulon shkresën mbi masën e zbritshme të dëmshpërblimit në lek dhe letra me vlerë, sipas standardeve të përcaktuara në VKM-në nr. 1253, datë 2.7.2008, “Për përcaktimin e kriterëve dhe të procedurave të vlerësimit për dëmshpërblimin e përfutur nga ish-të dënuarit politikë të regjimit komunist”, brenda 30 ditëve.

2. Për përllogaritjen e masës së dëmshpërblimit financiar të marrë nga ligjet e mëparshme, në të holla (lek) dhe letra me vlerë, nëpunësi përgjegjës bazohet në:

a) të dhënat e ish-Bankës së Kursimeve, aktualisht “Raiffeisen Bank”, në “Regjistrin e Bankës Raiffeisen”, i korrigjuar, mbi përfitimet në të holla (lek) dhe letra me vlerë, të marrë nga ligjet e mëparshme. Regjistër i dokumentuar në formë shkresore dhe CD nga “Raiffeisen Bank”, me shkresën nr. 8830/1, datë 10.8.2010.

b) formulari i vetëdeklarimit, aneksi 1, i cili i bashkëngjitet shkresës së Ministrisë së Drejtësisë, me subjekt mbi verifikimin e përfitimeve në të holla dhe letra me vlerë të marrë nga ligjet e mëparshme. Aneksi 1 konsiderohet i rregullt për të vazhduar procesin e llogaritjes vetëm kur është plotësuar në të gjitha kërkesat e emërtuara dhe i nënshkruar nga deklaruesi. Kur rezulton i pa plotësuar nuk shqyrtohet, por kthehet përgjigje për plotësimin e formularit A1.

3. Gjatë procesit të përllogaritjes së përfitimeve të marra nga ligjet e mëparshme në të holla (lek) dhe letra me vlerë procedohet, si më poshtë:

a) Në rastet kur vlera në të holla (lek) dhe letra me vlerë, në “Regjistrin e Bankës Raiffeisen”, të korrigjuar, është më e vogël se vlera e deklaruar në formularin A1 të vetëdeklarimit vullnetar, atëherë merret për bazë llogaritjeje vlera e deklaruar në formularin A1;

b) Në rastet kur në formularin A1 të vetëdeklarimit pasqyrohen vlera me shuma të mëdha, që janë jashtë kriterëve të parashikuara në VKM-në nr. 184, datë 4.5.1994, “Mbi dhënien e kompensimit pasuror të ish-të dënuarve dhe të përndjekurve politik, në zbatim të ligjit nr. 7748, datë 29.7.1993, të ndryshuar me ligjin nr. 7771, datë 7.12.1993, ‘Mbi statusin e ish-të dënuarve të regjimit komunist’”, dhe konstaton se të dhënat në “Regjistrin e Bankës Raiffeisen”, të korrigjuar, vlerat në të holla dhe letra me vlerë janë brenda kriterëve të VKM-së, të sipërshënuara, praktika i kthehet Ministrisë së Drejtësisë për rivlerësimin e kësaj praktike individuale për rilllogaritjen e përfitimeve nga ligjet e mëparshme;

c) Në rastet kur “Regjistri i Bankës Raiffeisen”, i korrigjuar, nuk ka të dhëna, mungon emri i ish-të dënuarit politik dhe formulari A1 i vetëdeklarimit vullnetar është brenda kriterëve të parashikuara në VKM-në nr. 184, masa e zbritshme e dëmshpërblimit financiar të marrë nga ligjet e mëparshme, në të holla (lek) dhe letra me vlerë, është e barabartë me shumën e deklaruar në formularin A1;

d) Në rastet kur Ministria e Drejtësisë kërkon rillogaritje të përfitimeve nga ligjet e mëparshme, struktura përgjegjëse për pagesat dhe dëmshpërblimet vlerëson të gjithë korrespondencën ndërmjet dy institucioneve me këtë objekt. Kur këto praktika mungojnë, i kërkon Ministrisë së Drejtësisë që për çdo rillogaritje të bashkëlidhë të gjithë korrespondencën ndërmjet dy institucioneve për këtë subjekt. Procesi i rillogaritjes kryhet duke zbatuar të gjitha procedurat e përcaktuara në këtë udhëzim për llogaritjen;

e) Në rastet kur në “Regjistrin e Bankës Raiffeisen”, të korrigjuar, ka më shumë se një ish-të dënuar me emër, mbiemër të ngjashëm dhe në shkresën e Ministrisë së Drejtësisë nuk ka të dhëna të tjera përveç emrit dhe mbiemrit, atëherë përfitimet e marra nga ligjet e mëparshme nuk përlllogariten, por i kthehet përgjigje Ministrisë së Drejtësisë, ku kërkohet që të pasqyrojë në shkresë të dhëna mbi vitlindjen, vitet e burgut për ish-të dënuarin politik, të dhëna të cilat janë pjesë e të dhënave të “Regjistrin të Bankës Raiffeisen”, të korrigjuar. Kur pas informimit mbi këto të dhëna rezultojnë se:

i. nuk kemi më shumë se një ish-të dënuar politik me të dhëna të ngjashme dhe gabimi është material në germëzimin e emrit, mbiemrit, si dhe të dhënat e tjera janë të pandryshueshme, atëherë shuma e dëmshpërblimit financiar të marrë nga ligjet e mëparshme është shuma e vlerave të regjistruara më shumë se një herë në “Regjistrin e Bankës Raiffeisen”, të korrigjuar;

ii. kemi dy apo më shumë ish-të dënuar politikë me të dhënat e ngjashme, por gabimi është material në germëzimin e emrit, mbiemrit dhe të dhënat e tjera janë të pandryshueshme, atëherë shuma e dëmshpërblimit është ajo e regjistruar në “Regjistri i Bankës Raiffeisen”, të korrigjuar.

4. Kur për masën e dëmshpërblimit financiar të marrë nga ligjet e mëparshme, në të holla (lek) dhe letra me vlerë, të pasqyruar në VKM-në “Për miratimin e dëmshpërblimit” ose në VKM-në “Për ndryshimin e VKM-së ‘Për miratimin e dëmshpërblimit’”, paraqitet një ankim nga ish-i dënuari politik apo trashëgimtarët e tyre ligjorë dhe nëse rezultojnë se masa e dëmshpërblimit financiar të marrë nga ligjet e mëparshme është më e vogël në “Regjistrin e Bankës Raiffeisen”, të korrigjuar, dhe në formularin A1, se vlera e pasqyruar në VKM, atëherë i propozohet Ministrisë së Drejtësisë për të filluar procedurën e rillogaritjes së masës së dëmshpërblimit financiar të marrë nga ligjet e mëparshme dhe njoftohet subjekti i interesuar mbi procedurat.

5. Kur për masën e dëmshpërblimit financiar të marrë nga ligjet e mëparshme, në të holla (lek) dhe letra me vlerë, të pasqyruar në VKM-në “Për miratimin e dëmshpërblimit” ose në VKM-në “Për ndryshimin e VKM-së ‘Për miratimin e dëmshpërblimit’”, nga ish-i dënuari politik apo trashëgimtarët e tyre ligjorë, paraqitet një ankim kur rezultojnë se masa e dëmshpërblimit financiar të marrë nga ligjet e mëparshme është barabartë me të dhënat në “Regjistrin e Bankës Raiffeisen”, të korrigjuar, me vlerën e pasqyruar në VKM, pavarësisht nga të dhënat në formularin A1, atëherë njoftohet individ i që ka paraqitur ankesën se pretendimet mbi të dhënat e pasqyruara në “Regjistrin e Bankës Raiffeisen”, të korrigjuar, zgjidhen vetëm në rrugë gjyqësore. Ministria e Financave nuk ka të drejtë të ndryshojë të dhënat e regjistrin dhe as të marrë në shqyrtim çdo dokument në formë shkresore të lëshuar nga kjo bankë me këtë objekt.

III. Procedurat dhe përgjegjësitë për shpërndarjen e dëmshpërblimit financiar të ish-të dënuarve politik, të miratuar me vendim të Këshillit të Ministrave

1. Ministria e Financave, pas botimit në Fletoren Zyrtare të VKM-së “Për miratimin e dëmshpërblimit për ish-të dënuarit politikë”, ose të VKM-së “Për ndryshimin e VKM-së ‘Për miratimin e dëmshpërblimit’”, i kërkon me shkresë zyrtare Ministrisë së Drejtësisë një kopje elektronike të anekseve “A”, “B” dhe “C”, të cilat janë një pjesë integrale e VKM-së. Kopjet elektronike të anekseve “A”, “B” dhe “C” ngarkohen në sistemin informatik mbi pagesat e dëmshpërblimit, të administruar nga Ministria e Financave dhe Ekonomisë (në vijim ministria përgjegjëse për financat).

2. Në bazë të buxhetit vjetor të vënë në dispozicion, fondi i dëmshpërblimit të ish-të dënuarve politikë nga regjimi komunist do të ndahet në mënyrë proporcionale për të gjithë përfituesit, me kusht që kësti i dëmshpërblimit të mos jetë më i madh se 1 000 000 (një milion) lekë.

3. Për të gjitha subjektet përfituese parësore, kur vlera totale e dëmshpërblimit është mbi 8 000 000 (tetë milionë) lekë, do të vijohet me pagesën e kështit pasardhës deri në shpërndarjen e plotë të shumës së miratuar.

4. Në rast se vlera totale e miratuar për të gjithë përfituesit është deri në 1 000 000 (një milion) lekë, shpërndarja e dëmshpërblimit do të kryhet me një kësht të vetëm, pavarësisht fazës në të cilën ndodhet shpërndarja e dëmshpërblimit. Me kryerjen e pagesës së dëmshpërblimit, për të gjithë përfituesit, brenda kështit më të ulët, fillon pagesa e kështit pasardhës. Ky mekanizëm do të përsëritet deri në shpërndarjen e plotë të shumës së dëmshpërblimit financiar.

5. Drejtori i strukturës përgjegjëse për pagesat dhe dëmshpërblimet i paraqet ministrin përgjegjës për financat, brenda datës 8 janar të çdo viti, raportim mbi shpërndarjen e dëmshpërblimit të miratuar dhe informacion për shpërndarjen e depozitave dhe ecurinë e këtij procesi gjatë vitit pararendës.

6. Shpërndarja në vlerë të plotë e dëmshpërblimit financiar të miratuar, për çdo të dënuar politik ose trashëgimtarë përfitues, kryhet në një llogari bankare, në emër dhe/ose për llogari të tij ose përfaqësuesit të autorizuar prej tij, me prokurë të posaçme, ku të specifikohet tagri ligjor për tërheqjen e shumës së dëmshpërblimit financiar, në një bankë të nivelit të dytë që vepron brenda territorit të Republikës së Shqipërisë. Vërtetimi i llogarisë së llogarisë bankare duhet të jetë i përditësuar dhe i lëshuar nga institucioni bankar, i cili i bashkëlidhet dosjes individuale.

7. Forma e pagesave, procedurat dhe funksionet e zbatimit të shpërndarjes së dëmshpërblimit financiar të miratuar evidentohen në sistemin informatik mbi pagesat e dëmshpërblimit, të administruar nga ministria përgjegjëse për financat.

8. Me çeljen e kështit pasardhës drejtorja njofton në faqen zyrtare të ministrisë përgjegjëse për financat, në bazë dhe për zbatim të ligjit në fuqi.

IV. Procedura e shpërndarjes së dëmshpërblimit financiar për dosjet e kategorisë joparësore në radhë pagese

1. Drejtorja e Pagesave dhe Dëmshpërblimeve publikon në mënyrë periodike, në faqen zyrtare, listat e dosjeve të gatshme për pagesë dhe bën njoftimin për të gjitha subjektet përfituese të kategorisë joparësore (familiarë të ish-të dënuarit), pjesë e listës, nëpërmjet njoftimit me mjete të komunikimit elektronik dhe medias publike. Dosjet publikohen në faqen zyrtare në radhë kronologjike sipas numrit të pagesës më të ulët që ka marrë dosja, kur është paguar për herë të parë në sistemin elektronik të drejtorisë përgjegjëse për pagesat dhe dëmshpërblimet.

2. Brenda një afati 3-mujor nga data e publikimit të listës, të gjithë trashëgimtarët e ish-të prindjekurve politikë, të cilët janë përfitues të dëmshpërblimit financiar, duhet të dorëzojnë në drejtorinë përgjegjëse për pagesat dhe dëmshpërblimet dokumentet e parashikuara në aktet nënligjore.

3. Kur një ish-i dënuar politik ose trashëgimtari i tij nuk dorëzon dokumentacionin e kërkuar brenda afatit të parashikuar më sipër, ai/ajo njoftohet lidhur me përfundimin e afatit dhe i jepet edhe një afat shtesë deri në 30 ditë. Në rast se dokumentacioni i kërkuar nuk dorëzohet edhe brenda afatit 30-ditor, pagesa i kalon personave që nuk bëjnë pjesë në kategorinë e subjekteve përfituese parësore, të cilët në përputhje me ligjin kanë dorëzuar dokumentet e duhura dhe janë të gatshëm për pagesë.

4. Procedura e shpërndarjes së dëmshpërblimit financiar për dosjet që janë në radhë pagese dhe janë publikuar në faqen zyrtare, nga ana e drejtorisë përgjegjëse për pagesat dhe dëmshpërblimet, do të procedohet si më poshtë:

a) në rastet kur përfituesit, brenda afatit 4-mujor që përcakton neni nr. 14 i ligjit, kanë plotësuar të gjithë dokumentacionin ligjor të kërkuar, drejtorja përgjegjëse për shpërndarjen e dëmshpërblimit financiar përfshin dosjen/et në listë për pagesë dhe vijon procedurën e shpërndarjes së dëmshpërblimit financiar;

b) pas maturimit të afatit ligjor, vijon procedura për shpërndarjen e dëmshpërblimit financiar të dosjeve që janë publikuar, por nuk e kanë plotësuar të gjithë dokumentacionin ligjor të kërkuar (dosje të pjesshme). Përfshirja në lista të këtyre dosjeve bëhet duke marrë në konsideratë numrin e pagesës që ka përfituar për herë të parë dosja, në rend rritës nga numri i pagesës më të vogël tek numri i pagesës më të madhe, si dhe datës së dorëzimit të dokumentacionit ligjor nga ana e përfituesve të dosjes. Kjo procedurë për dosjet e pjesshme vijon deri në fazën e ripublikimit të dosjes.

V. Dokumentet që duhet të depozitohen pranë Ministrisë së Financave nga ish-të dënuarit politikë ose trashëgimtarët e ish-të dënuarve, për shpërndarjen e dëmshpërblimit financiar, të ndarë sipas kategorive

1. Për kategorinë e subjekteve përfituese parësore:

a) Të gjithë subjektet përfituese të kategorisë parësore duhet të paraqiten në ministrinë përgjegjëse për financat për të plotësuar Deklaratën Personale të Aplikuesit, me qëllim mundësimin e printimit të certifikatës së tyre personale nëpërmjet portalit të ofrimit të shërbimeve të qytetarëve *online, e-albania*, në bazë dhe për zbatim të vendimeve Këshillit të Ministrave;

b) Ish-të dënuarit politikë, të cilët janë përfitues të dëmshpërblimit financiar dhe që janë në pamundësi objektive për t'u paraqitur pranë ambienteve të Drejtorisë së Pagesave dhe Dëmshpërblimeve për të plotësuar Deklaratën Personale të Aplikuesit, mund t'i drejtohen zyrës së noterisë në qytetin ku kanë vendbanimin dhe të plotësojë një deklaratë/dëshmi gjallërie, të cilën duhet ta dërgojë nëpërmjet shërbimit postar pranë Drejtorisë së Pagesave dhe Dëmshpërblimeve/ Ministria e Financave dhe Ekonomisë. Në rast se deklarata/dëshmia e gjallërisë bëhet jashtë territorit të Republikës së Shqipërisë, ajo duhet të jetë e përkthyer dhe me vulë apostile. Deklarata/ dëshmia e gjallërisë duhet të jetë origjinale ose e njehsuar me origjinalin.

Këto subjekte duhet të depozitojnë pranë drejtorisë përgjegjëse për pagesat dhe dëmshpërblimet, dokumentacionin si më poshtë vijon:

i. mjet identifikimi (kopje ID-je/pasaportë) e vlefshme në territorin e Republikës së Shqipërisë;

ii. vërtetim llogarie bankare në monedhën lek, të lëshuar nga njëra nga bankat e nivelit të dytë që vepron brenda territorit të Republikës së Shqipërisë (personat që depozitojnë numrin e llogarisë bankare duhet që të sigurohen që llogaria bankare, në të cilën do të depozitohet kësti i radhës, të jetë ende aktive);

c) ish-të dënuarit politikë që jetojnë, kanë të drejtë ta delegojnë me prokurë të posaçme tërheqjen e dëmshpërblimit financiar. Në këto raste veprimet nga ministria përgjegjëse për financat bëhen në emër të personit me këtë të drejtë, i cili duhet të dërgojë në adresën e institucionit dokumentacionin, si më poshtë vijon:

i. prokurën e posaçme, origjinale ose të njehsuar me origjinalin, bashkëlidhur kopja e vlefshme e dokumentit të identitetit (ID/pasaportë) për çdo të përfaqësuar;

ii. vërtetim llogarie bankare në lek, në njërën nga bankat e nivelit të dytë, në emër të tij (personat që depozitojnë numrin e llogarisë bankare duhet që të sigurohen që llogaria bankare, në të cilën do të depozitohet kësti i radhës, të jetë ende aktive);

iii. mjet identifikimi (kopje ID-je/pasaportë) të vlefshëm të tij.

ç) për kategorinë parësore ish-të dënuarit politikë që nuk jetojnë dhe që kanë trashëgimtarë të radhës së parë, të cilët janë në moshë të mitur, me hyrjen në fuqi të këtij ligji, dokumentet që duhet të dërgojnë janë:

i. certifikatë vdekjeje e ish-të dënuarit politik;

ii. certifikatë e trungut familjar të ish-të dënuarit politik, ku të përfshihen: fëmija/fëmijët e mitur;

iii. certifikatë personale e të miturit/miturve, trashëgimtarë të radhës së parë të ish-të dënuarit politik që nuk jeton;

iv. dëshmi trashëgimie për ish-të dënuarit politikë, origjinale ose kopje e noterizuar;

v. vendim gjykate të kujdestarisë mbi të miturin në rastin kur edhe nëna/babai i të miturit nuk jeton më;

vi. nr. llogarie bankare në lek, në emër të kujdestarit ligjor të të miturit, në njërën nga bankat e nivelit të dytë, që vepron brenda territorit të Republikës së Shqipërisë. (Personat që depozitojnë numrin e llogarisë bankare duhet që të sigurohen që llogaria bankare, në të cilën do të depozitohet kësti i radhës, të jetë ende aktive);

vii. mjet identifikimi (kopje ID-je, pasaportë) të kujdestarit ligjor.

d) Kur ish-i dënuari politik që jeton ose trashëgimtari ligjor humbet zotësinë juridike për të vepruar, me vendim gjykate i është përcaktuar kujdestari ligjor, në këto raste veprimet nga ministria përgjegjëse për financat bëhen në emër të personit me këtë të drejtë. Kujdestari ligjor duhet të dërgojë në adresën e institucionit dokumentacionin ligjor të kërkuar:

- i. vendimin e gjykatës mbi kujdestarinë ligjore, origjinale ose kopje e njësuar;
- ii. numër llogarie bankare në lek në njërin nga bankat e nivelit të dytë, në emër të kujdestarit ligjor;
- iii. mjet identifikimi (kopje ID-je/pasaportë) të vlefshëm të kujdestarit ligjor;
- iv. deklarata personale e aplikuesit.

2. Ish-të dënuarit politikë që jetojnë ose trashëgimtari ligjor, kanë të drejtë ta delegojnë me prokurë të posaçme tërheqjen e dëmshpërblimit financiar. Në këto raste, veprimet nga ministria përgjegjëse për financat kryhen në emër të personit me këtë të drejtë. Personi me këtë të drejtë duhet të dërgojë në ministrinë përgjegjëse për financat:

- a) prokurën e posaçme, origjinale, bashkëlidhur duhet të ketë kopje të vlefshme të dokumentit të identitetit (kopje ID-je, pasaportë) për çdo të përfaqësuar;
- b) numër llogarie bankare në lek në njërin nga bankat e nivelit të dytë, në emër të tij;
- c) dokument identiteti (kopje ID-je, pasaportë) të tij;
- d) deklaratë personale e aplikuesit.

3. Ish-të dënuarit politikë që jetojnë, ose trashëgimtarët ligjor të cilët figurojnë të çregjistruar në Regjistrin Kombëtar të Gjendjes Civile, pasi kanë lënë nënshtetësinë shqiptare ose figurojnë me dy nënshtetësi, duhet të dërgojnë një dokument identifikimi të vlefshëm (vërtetim gjallësie) jo më e vjetër se sa një javë nga data e dorëzimit, me vulë apostile/i legalizuar nga vendi në të cilin janë rezident, të përkthyer dhe noterizuar.

VI. Dokumentet që duhet të depozitohen pranë ministrisë përgjegjëse për financat nga trashëgimtarët e ish-të dënuarve politikë

1. Për trashëgimtarët e ish-të dënuarve politikë, që nuk bëjnë pjesë në kategorinë parësore, dokumentet që duhet të dërgojnë janë:

- a) dëshmi trashëgimie ligjore për të dënuarin politik, origjinale ose kopje e njësuar, noterizuar;
- b) certifikatë vdekjeje, origjinale, për ish-të dënuarin politik dhe për çdo trashëgimtar të radhës së parë që nuk jeton më;

c) certifikatë të trungut familjar origjinal (ku të figurojnë të gjithë trashëgimtarët) për ish-të dënuarin politik dhe të çdo trashëgimtari të radhës së parë që nuk jeton më;

d) numrat e llogarisë bankare në lek për çdo trashëgimtar ose për personin e autorizuar me prokurë të posaçme për tërheqjen e dëmshpërblimit, në njërin nga bankat e nivelit të dytë që ushtron veprimtarin brenda territorit të Republikës së Shqipërisë (personat që depozitojnë numrin e llogarisë bankare duhet që të sigurohen që llogaria bankare, bankare, në të cilën do të depozitohet kësti i radhës, të jetë ende aktive);

e) mjet identifikimi të vlefshëm (kopje ID-je, pasaportë) të çdo trashëgimtari ose të personit që ka prokurë të posaçme për tërheqjen e dëmshpërblimit.

2. Kur një trashëgimtar i radhës së parë, të ish-të dënuarit politik, nuk jeton, për të tërhequr dëmshpërblimin, trashëgimtarët e radhës së dytë (fëmijët e tij) duhet të dërgojnë në ministrinë përgjegjëse për financat të gjithë dokumentet e shënuara në pikën 1, për trashëgimtarin e radhës së parë që nuk jeton.

3. Kur një trashëgimtar i radhës së dytë nuk jeton, e drejta e tyre për dëmshpërblim në bazë të ligjit nuk vazhdon më tej dhe kjo pjesë takuese kalon në buxhetin e shtetit. Në këtë rast rrethi i familjarëve duhet të dërgojë në ministrinë përgjegjëse për financat:

- a) certifikatën e vdekjes së trashëgimtarit të radhës së dytë që nuk jeton.

4. Personat, të cilët nuk dëmshpërblehen, për shkak të mosplotësimit të dokumenteve, gëzojnë të drejtën për të marrë këstin e kësaj pagese në fazën tjetër, por jo më vonë se tre vjet pas publikimit të emrit për herë të parë në faqen zyrtare.

5. Për shpërndarjen e kësteve të tjera, pagesa e këstit vijues, do të kryhet mbi bazë të dokumentacionit të dërguar më parë, kur nuk ka:

- a) kontestim, nga rrethi i familjarëve ose të trashëgimtarëve;
- b) ndryshime të statusit të ish-të dënuarit politik ose të trashëgimtarëve që jetojnë;
- c) revokim të prokurës së posaçme.

6. Kur trashëgimtarët, sipas këtij ligji, e revokojnë delegimin me prokurë, dokumentacionet që duhet të dërgojnë në ministrinë përgjegjëse për financat janë:

- a) revokimi i prokurës, origjinale ose kopje e njësuar;
- b) numër llogarie bankare në lek për çdo trashëgimtar;

c) dokument identifikimi (kopje ID-je, pasaportë) për çdo trashëgimtar.

7. Për çdo shpërndarje të kësteve vijuese, trashëgimtari ligjor, duhet të dërgojnë në Ministrinë e Financave këto dokumente:

a) mjet identifikimi të vlefshëm (kopje ID-je, pasaportë) të çdo trashëgimtari ose të personit që ka prokurë të posaçme për tërheqjen e dëmshpërblimit;

b) numrat e llogarisë bankare në lek për çdo trashëgimtar, ose për personin e autorizuar që ka prokurë të posaçme për tërheqjen e dëmshpërblimit në lek (dokumenti i bankës duhet të jetë i periudhës kur dorëzohet dokumenti dhe të sigurohen që llogaria bankare, në të cilën do të depozitohet kësti i radhës, të jetë ende aktive).

8. Në mbështetje të dokumentacionit të depozituar pranë ministrinë përgjegjëse për financat, drejtoria përgjegjëse për pagesat, në zbatim ligjit në fuqi për dëmshpërblimet e ish-të dënuarve politikë, të vendimeve të Këshillit të Ministrave dhe të udhëzimit të ministrit të financave, realizon shpërndarjen e pagesave të kështit të radhës, duke bërë kontrollin e dokumentacionit të depozituar për çdo dosje individuale të ish-të dënuarve politikë, pranë kësaj drejtorie dhe duke ndjekur radhën e pagesave të paguara ndër vite.

VII. Udhëzimi me nr. 5, datë 15.4.2016, “Për procedurat për llogaritjen e përfitimeve nga ligjet e mëparshme dhe të pagesave të dëmshpërblimit për ish-të dënuarit politikë të regjimit komunist”, i ndryshuar, shfuqizohet.

VIII. Ngarkohet Drejtoria e Pagesave dhe Dëmshpërblimeve në Drejtorinë e Përgjithshme të Thesarit për zbatimin e këtij udhëzimi.

Ky udhëzim hyn në fuqi pas botimit në Fletoren Zyrtare.

MINISTËR I FINANCAVE DHE EKONOMISË

Ervin Mete